

四庫全書

集部

欽定四庫全書

集部

都官集卷十一至
四

詳校官編修臣馬啟泰

檢討臣何思鈞覆勘

膳錄監生臣秦澐

膳錄監生臣吳殿英

膳錄監生臣汪麟

膳錄舉人臣秦櫟

欽定四庫全書

都官集卷十一

宋 陳舜俞 撰

啟

賀文相公啟

某伏審樞密太尉相公光奉制函進司樞席高賢當柄
率土同懽恭惟太尉相公道燦三英材兼九德風雲際
會出乎聖人之時虹霓光輝爛然天下之望勲勞中外
清白邦家斷國論之安危多所取重裨化鈞之舒慘無

有間言上方經武巖廊仰成密勿眷惟付任美矣知臣
帷幄前籌調五兵於不戰璣衡賦政均百度以參和某
幸出門闌尤深鼓舞

賀富相公啟

某啟伏審相公登庸天下幸甚伏惟相公臯夔之偶伊
呂弗加挺生於韓實輔吾宗忠義一節凜如冰霜功名
三朝光於竹帛固已身屬天下之大事又常力行衆人
所不能作萬世之金城為九廟之磐石天付大任士無

間言方且厭百度之圯隳咸一德而脩舉治條講三代
之盛天聲懔八荒之區嘉謨有為而前之所居者未久
休德旁施而下之所蒙者未終茲還元台實就鴻烈衆
賢以彙竭蹶而同歸羣生在鈞鼓舞之如昨某根荄至
賤生育有初際會於斯歡幸無極流落窮遠瞻望勤勞
下情不任虔切惶懼之至謹奉啟事陳賀伏惟鈞慈俯
賜鑒念謹啟

賀張參政啟

某啟伏審叅政侍郎光奉制書榮叅國政洪鈞之下起舞皆同伏惟叅政侍郎金玉清規著龜令智一言寤主斷大論以持危四海想風起懦夫而增氣勲績交輔於中外謙恭多助於天人爰自表正樞庭坐叅基命籌帷多勝雖柄託之不虛台鼎未調在輿言之未厭果茲易地聖矣知臣百度叅和羣生蒙福舟航濟物奮庸已副於巖廊竹帛圖勲正席佇光於公袞

賀叅政給事啟

某近覩邸報伏審光膺帝命入贊公台凡屬陶鎔不任
忭慰恭以叅政給事才推王佐望重國華蓄諒直之嘉
猷富經綸之茂業夙蘊大臣之量自膺明主之知入贊
機衡正朝廷之大事出居牧伯宣屏翰之元勲薦更中
外之司允著丞疑之望僉諧伏屬上意所知果由三接
之恩再副貳公之化仰以正人君之闕下以裨輔國
之宜謨社稷之永圖恢廟堂之奇算經邦論道資啟沃
於天心偃革為軒贊成平於帝業即正保衡之任以昭

垂拱之風庸副具瞻永宣一德

賀樞密太尉啟

某近覩邸報伏審樞密太尉光奉制書自登左府伏增
懽慶竊以亞承弼之位參帷幄之司密勿王猷正天下
之機事統和師律制閭外之權謀必資俊傑之才用副
股肱之任恭以樞密太尉氣含元一德稟中和明社稷
之遠圖蘊廟堂之良具夙邁千齡之旦仰膺萬乘之知
出鎮鉅藩入貳樞政上心隆於倚注百辟仰於儀型式

允僉諧爰正近密矧以兵車方偃戎醜悉平以成文武
之大功式賴蕭張之奇策茂邦家之福祉慶天地之成
平丕冒鴻圖永清四海即兼輔相式副民瞻

賀樞密侍郎啟

某啟伏審某官榮膺綈誥入輔樞庭勲業所鍾華夷同
慶恭惟某官秀含辰緯學粹師閎身為儒宗早提衡於
鴻筆自結明主徐步武於青雲素風常激於士倫大誼
交裨於國論玉堂制作雅追二典之淳金鼎調和久著

羣生之望聊分宥密以究經綸黜陟有聲可陋魏相之
在漢將明賦政未推山甫之興周即正師瞻以如輿議
某素叨長育竊慶亨嘉惟是歡悰實殊彝等更祈上符
眷託順講聖經謹奉啟起居陳賀伏惟臺慈俯賜覽念
賀歐陽樞密啟

某啟伏審樞密侍郎先生拜命禁垣開榮樞府朝廷有
道聖主知臣不以賢愚皆同鼓舞恭惟樞密侍郎先生
勲業居高於天下文章度越於古人帝書百篇鴻筆追

風於二典師牆九仞諸生就列於四科表則邦家勤勞
內外當世獨出羣公無前所不厭乎輿言以未付之大
任是用延登宥密之地厯試將明之才帷幄英謀近可
以紀綱一世廟堂勝算大可以臣妾百蠻將見真儒之
所施以慶蒼生之蒙福

賀陳樞密啟

某啟伏審樞密諫議被恩宸綍進秩樞庭凡在陶鎔不
任慶忭伏惟某官大猷經遠碩德鎮浮謹議嘉謀雅稽

參於王體英聲茂績嘗度越於臣隣簡在上心蔚為時棟爰自報政三輔提綱百司終需大鈞始厭清議果開宥密之地以賦將明之才

賀龐樞密啟

某伏審光被制函入贊機務凡在鈞播舉集歡誠竊以朝廷宥密之司導宣於明命帷幄訏謨之地經理於大猷矧練核以攸難蓋倚毗之是重恭以樞密稟德淳至抱器閎深立朝敦密靜之風鎮俗樹良明之化間以醜

羌犯境銳師留屯將以儒臣總斯戎律眷求扞禦之略
分沮桀黠之威且頗收之材久輟從於中禁而伊呂之
佐宜登進於明庭爰紀殊庸式需徽典裁成百揆方入
秉於國鈞仰正三階佇陞臨於鼎席某瞻望軒墉卑情
無任欣忭激切之至

賀吳樞密啟

恭以樞密某官志抱忠概業暢文經體方重以立朝審
籌謀而居國掖垣清切早敷述於訓辭內相尊嚴亦參

決於庶政益厚聖宸之眷入登樞近之榮百度咸熙式
分於邦輔萬方是式佇正於巖瞻

答同年交代啟

某解褐榮途嘗竊同年之幸下車庇邑欽聞既久之思
方仰奉於成規乃遠貽於休問伏審頒條甚暇養浩彌
沖大慰傾風何勝永好伏惟某官道謀王體政實吏師
出守中和茂宣儒者之素入朝功狀妙膺天子之知豈
茲一麾可掩大用行聞節名慎護春旗

上唐州知郡高大卿啟

時宰南陽

某伏念筮仕入朝早想聞於龍坂字人為邑幸密邇於
侯藩屢窺隣燭之光彌著高山之仰屬簡書之多畏奉
竿牘以後時既愆事大之儀尤積藏中之愧恭惟某官
直方種德渾厚深仁簪組有輝赫赫本朝之望旌麾所
至優優循良之師眷乃名城昔安善化千里變樂耕之
野九重分共治之憂璽書賜金已講漢廷之故事緇衣
入覲遠追衛武之英風畏暑方隆珍調宜備

賀運使啟

某伏審運使駕部光膺睿選出攬使權凡屬提封同歡
聽命恭惟某官挺生慶緒練識彞倫素風不墜於家聲
大誼必斷於經術逢辰早達所至皆賢天府浩穰申畫
方喧於倚辦外臺刺舉觀風無切於澄清乃眷才猷特
分憂寄百城坐照豈湏攬轡之多三接寵酬竚對追鋒
之召

謝改官答賀書啟

某叨被朝恩序遷官著退惟僥冒交積兢營斯蓋某官
盛德兼容餘光遠照致茲冗散亦被寵升敢冀勞謙重
貽慶牘慙荷之素敷述奚殫

謝秀才投贄見訪啟

某啟伏蒙秀才即先輩枉珍駕以及門貺雄文而滿帙
承顏愧受足認推先拭目鋪觀有開固陋恭惟秀才即
先輩粉榆擢秀蘭芷翹芳涵肆羣言必見聖賢之蘊根
抵衆美率歸仁義之純發為文辭粹得體要足以擅一

時之美價於茲掩多士以先登辱朝廷遴東以降書乃
郡國奉行而論秀需亨有素晉取其時麟角呈祥顧珍
羣而莫掩鵬圖得志信遠到以難量如某樗質匪材茅
心自塞荷風猷之特厚示禮等而不遺錦繡甚華被墻
非稱莖韶間發忘味可知測畔岸以未能但珍藏而永
好過此以往未知所裁

回舉人謝解啟

某啟伏承秀才即先輩出應新書榮居茂選以某繆當

奉檄來預程文觀雅俗之盛儀副長牋而枉謝猶之蘊
玉既幸榮觀復此摘華何勝被服禮意交至感愧相并
竚聽茅征終符柏悅

與錢塘知縣殿丞啟

某雖垂際會久仰風徽恭惟製錦之餘克固練神之福
伏惟某官鍾英慶緒擢秀清時結綬黃畿綽有甚高之
望投刃餘地浸喧所至之聲惟此吳疆猶淹晉用伊朝
嚴召不次褒升順履清和倍祈頤養

謝越州知府大卿啟

某瞻仰高山積有歲月參差末路不過門闌欲通尺簡
之儀愧無文席之雅而昨療官於邑播謫而歸命彼載
之蒙惠厚甚感慙并具嚮往增勞恭惟樂偃息於名城
邃和倪於神宇伏惟知府大卿高議出乎今古懿行著
於家邦多聞博識世以為師清談雅言聞者咸誦謀議
屢裨於國論中和常至於吏循幸茲輿州僕我舊德謳
謠衆口惟憂留借之難巖穴公言又恨咨詢之晚叢然

蹇往藐矣遐征未知與進之年但有無疆之頌

賀南康知軍郎中啟

某伏審知軍郎中榮膺宸檢來領軍麾獲與下風咸增
忭慰伏惟知軍郎中奎文照爛淵度汪涵韋相一經早
欽世學漢臣萬石遠紹家聲暫分簡在之才屑治湖濱
之壘更冀上符眷託倍護珍羞

欽定四庫全書

都官集卷十二

宋 陳舜俞 撰

詩

遇便風

舳艫沂隋堤積潦涵楚甸大帆挂長檣薰颿借良便氣
張中軍旗勢疾强弩箭浪頭噴飛雪波心落流電或如
春雷振又若疾雨濺天空文鷁歸珠媚淵龍戰久來去
意切幸此行色變舟子嘯引項挽夫喜盈面揭篙無施

勞躍馬莫我先行吁思景附坐指交勇義日陰未頃刻
道里厯寓縣津亭修渡淮官堠俄入汴盛夏草木齊速
水蘋藻遍晚景稍可愛少瞬不再見我非欲速者疾目
憎轉眩衣袂聊虛涼心焉獨安宴向夕風少休遲留樂
幽勝

失題

昔見淮水清今見淮水渾問之何因爾淮吏謂予言此
淮出桐柏彼汴來崑崙年年相合流東望滄溟奔汴入

淮而清有若淮水尊風休一色靜古鑑磨無痕今年淮
水小僅能庇龜黿黃河從春來桃花注龍門滔滔朝宗
勢巨浪日夕煩小清納大濁勢不得自存崩騰一波走
磅礴泥沙噴我聞吏之言冥默竊自論君子潔履操小
人為詐謾姦豪爍危行烈火燎于原譁言污正論青蠅
止于樊中人可移性鮮克終始惇夙夜念淮水清心大
吾源

中秋翫月宴友

秋氣清且勁夜色澄無譁月當澄清間百倍常光華金
盤挂澗瀼水鑑磨痕瑕未離碧海久漸到黃道斜常娥
瓊肌滑羞死吳宮娃蟾蜍銀窟寒不穴死水蓂依稀聞
兔擣髣像見桂花豈止數千里已照萬人家都人尤侈
盛時節惜芳佳樓臺延皓魄簾幕去周遮交錯宴子女
嘈雜鳴簫笳清影落酒盞爽氣侵巾紗當明復置燭擲
果如散沙而我旅其間甚貧亦可嗟遂召朋友云可飲
文字耶客來俄滿堂風稜森鏤鐫主人出對客衰病植

蒹葭所共天上景能如富者奢汗樽薦醅蟻獠羞錯魚
蝦釋焉帽與帶果止柰與瓜高言抗崢嶸冲靈坦四容
情親弗委曲論極成紛挐寒稜入吟骨歡意自天涯不
因斗柄轉豈信漏刻賒無端雞三號漸引鼓五撾良會
誠惜已同心又何加殘輝促坐席曉意生微霞明發作
此詩遺我異時誇

種梅

始我窺山中早與梅花期低回遂四十種樹計已遲樵

夫致遠枿園官送新枝故土謹包裹深根屢培植連宵
霖霖雨迨此初陽時繞徑一百樹撫視如嬰兒古來橫
斜影老去乃崛竒嗟爾生也晚笑我行且衰世人非金
石或作千年資轉眼共零落較此不更癡有情且寓賞
勿著喜與悲青赤榮點白一笑唱吾詩百年霜雪過好
者知為誰

公署井詩

老屋廕大井置綆百尺修疏鑿不知年人其古諸侯源

從下山來涓涓無時休旱地千里赤淵泉獨清浮六月
如焰火寒冽冰雪侔萬家濱雙溪卓此名一州纍纍挈
瓶人踵門日見投賓至遽欲起命酌輒復留豈不敵醞
醕渴疾飲以瘳庠序闕講問閭閻淺誰予求自反對井德
飲水良可羞

桃花塢

路轉青山曲地暖留青春昔聞千樹桃香艷紅氤氲遊
子想神仙花下啼鳥馴于今空蔓草况復種桃人唯應

塢中月清光無故新

餞張郎中

莫愛卞山色莫羨苕水清
山高天早寒水深潛浪生
維此賢丈人字韻和且平
冷清宵無威妍辭吐春英
衆人翫其華君子挹中情
愷悌神所勞假樂眉壽并
安車省家園華父立兒甥
邦君示尊禮宴衍既豐盈
言還湖上居載酒餞東城
賓醉可復訴貴老事非輕

送詩僧惠師

蕭然林下人病骨霜松槁若為詩家流力壓古人倒琢
句如琢玉得之若得寶有時到極摯直可補元造平生
樂此樂白頭不知老數年吳楚游詠遍泉石好却懷中
山隱鄉思滿春草橐中何以歸篇篇有留橐

采芑詩

采采原上芑盈襜不知多惜共藜藿稱命與羹糝和值
此行役間遺餘雜蓂莢京洛誇肥甘掇擷緊誰何休官
業已定不待此首瞻年年春物繁期爾山之阿

野燒

急燒山上草莫顧山下木燒草得地美欲種來歲粟乘
風縱巨燎烈烈遍嵒谷既不問玉石何暇愛麋鹿寄謝
種粟翁乘時擇嘉穀無俾糧莠俱還見故草綠棟材已
灰燼着意規飽腹

廉溪

豈無城中居高牆圍大屋愛此原野間山靜溪水綠人
家買良田歲取十千穀我耕山下土所獲亦以足藜羹

佐淵魚晨炊買樵木客來好風日濁酒醉籬菊主人去
微官歸意常欲速畫圖隨行李林園日在目公卿為之
賦佳句滿瑤軸年來請便郡旦暮戒僮僕乘霜歸荒徑
趁雨添新斲應恨公未歸公貧猶待祿

寄揚州知府錢舍人

歲月倏已逝流光浩無涯新陽達厚地草木漸萌芽禽
鳥知時節聲哢日夕嘉人生獨何為不與物同華齒髮
但搖落唯有老大加緬懷西垣客事業紛天葩三年辭

帝右士夫嘆聲牙道大益不容眇小固何嗟聞有難老
藥沆瀣和丹砂但願壽百歲未能定龍蛇

靈祐觀

緬彼幽虛天曾是衆仙園宮祠宅來儀紺瓦覆蒼甃
扉秘環珮几席被文繡傳聞祀禱神祠宮燦如晝樵蘇
避山村草木長踈秀祥符聖天子慕道比軒后縣官典
修完錫名揭靈祐星璫捧金龍沉以玉簡副邇來三十
年寂寞事非舊黃冠守蕭堂香火雜薪楨神州祠太乙

司農治華構休祥祚邦國巖穴甘僻陋游人獨何求
豐碑讀古籀

保聖院

門深鎖蒼苔地靈育嘉樹寂然烟雲宅不接市朝路
苟能灰心居即是古樂處

贈孔經甫賢良兼簡許少張狀元

晚泊姑孰浦忽逢瀟湘人口稱丹丘客面帶湘江雲
此客骨不凡九天之麒麟新上紫烟頂以頭觸天門赤龍

怒當路天矯驚百神麒麟顧何力牙爪勇踞蹲既欲倚
其角又或批其鱗此身甘萬死壘粉不逡巡帝曰汝無
罪濯濯良不羣輟吾黃金鋪縱之赤城塵收頭縮下土
別待風雷春龍怒逐之去四海波濤翻顧我天一涯遺
下顏色溫昔為游天夢嘗受一日恩老來因對客念往
驚之魂寄謝剡溪子入朝可無言

寄虔州東禪惠長老

山僧未識面遠想何瀟洒客從贛上來肯可必儒雅學

詩擬柴桑陳編長在把冥搜得佳句沖淡相上下由來
淵源遠知解妙空假史君固好善公餘枉車馬玄談間
清吟至樂匪尊筭借問歲早晚重脩遠公社

次韻酬郊郎中

直道焉不黜士生常苦貧此語聞則舊今見賢丈人三
十取科第初走州縣塵清不受一毫義或重萬鈞四十
雖宦達五十已遘屯有如車脫輻挽之又埋輪南棲窮
山中茅屋無比鄰瘦田兩三稜過半生荆榛年豐苦不

飽況復水旱頻予常訪其居會合歡無垠念此太幽獨欲
去彌傷神勸君胡不歸清霄多交親旋聞理舡艫送之彭
蠡濱今來復相過三見汀洲春雖云故鄉樂還似枯池鱗
僧坊避風雨所賴太守仁隨衣度伏臘計俸紆晡晨無妻
眠抱影失子淚沾巾穹蒼杳難知善人獨不振公懷自曠
達陶然樂天均作詩擬淵明委形任屈伸所喜樽有酒且
樂圃有筠我思得高義列鼎鋪重茵館之華堂上歲與未
百困使無寒飢顧便可謝簪紳世俗念已薄此邦非等倫

東臺有序

太博劉公嘗自賦所居之東臺詩云茲臺乃
主人吾身同過客可謂達生之至言也客有
託為臺答公頗稱公道德然未盡其所以相
為賓主之意於是為賦詩一篇

築臺俯園木亦既覆華宇主翁達生者作詩榜門戶謂
臺乃主人吾身同逆旅臺還謂公言無易浪稱與天地
猶大塊況此一抔土我昔未為高蟻垤動欲雨翁欲事

畚築金鉏莫論堵軒陞因冠帶松筠漸儔侶萬物固何
常今日乃前古高岸化深谷白波起桑圃短長雖有間
相去能幾許翁閒賓客至只此薦芳醕翁仁妻孥樂且
以饌肥羜高明照圖史啟塞順寒暑鄙夫不能此蟋蟀
賦其除臺公默相忘勿復問賓主

贈劉道原

三年江湖上得友唯道原少小負英特誦書日萬言長
好史氏學執筆以專門廢興數千載抵掌洪河翻潔身

比夷齊見義勇育貴唯不善立解惡佛如仇冤我雖異
於此知有學行尊就之同霧露貴之如瑤琨共為廬山
游移宿窮林園水石最好處盡日流清尊所願聞高談
美若嘗熊蹯夫子之故人公台既調元聞初學問時幽
蘭並芳蓀及今議論乖良弓對驚猿雲泥成睽離治亂
空自論古來用才者如梓匠輪輶短長無棄遺同異非
讐恩何不付國史置子西掖垣我語雖鄙賤幾欲叫天

閣

此一篇今於江
州圖經內編入

湖州李使君聞予遊寄書云為我一謝清絕

道微本一致喧靜偶殊轍眷言朝廷士何必山水悅李
侯稟靈氣家園隣大別廬峯五千仞曾上捫日月一隨
青雲友久仕金馬闕茲為東南守雙溪對寒潔因將洞
庭客寄使謝清絕想君惜不往搔首厭符節澤民固重事
逸興聊可輟已告林屋天金庭錫期奎

初入太湖

東南有具區三萬六千頃百川之雄偉咸池偕溟滓玉

堂在其下莫知日月永鴟夷昔不返肯顧市朝請素懷
邈已勞孤泛此方逞刺沙出林荒度淺動蘋荇漸盡行
漸遠灣轉勢彌迥疑非地可載直與天作境青空四垂

幕亂山不能屏淼茫白鳥行浩漾好雲影邏呼十漿急

眾橫九帆並

一船橫立九帆
乘風網魚眾

霽中波有光風後浪猶猛

澎湃聞乍愜拋碇內還省我量覺蹄涔此身實萍梗淵
神慄寒肌浸氣飄素領觀瀾念往術濯纓悼前青未能
追高謝且以卒流景吟非誇獨清濟乃仗中靜寄謝洞

庭君終來老魚艇

雪溪

吳王城下溪疏鑿自開闢潭潭無涯岸但見浸垂碧氣
增宇宙寬勢吞江湖窄樓臺照清影汀洲多嘉植紅鱗
生霞朝金鑑沉月夕恍如神仙國遠與塵土隔恠說稔
傳聞真源探圖籍天目據西南兩地瀉峻極其傍數百
壑奔走為附益及茲淵渟處深不可計尺稻梁活萬家
世無原田瘠魚鰕孕千名日是網罟獲陰陰風雨夜多

為蛟龍宅少遊溪上學長作幕下客觀瀾撫前志平世
恥吟澤度量方潢汙臨流重慚惜

林屋洞

洞天三十六第九曰林屋神仙固難名瓌怪存記錄曠
歲懷尋賞茲辰幸臨矚馳神在真游豈復惴深谷解韞
納芒履燃松命光燭初行已偃僂漸入但匍匐顧瞻避
衝磕寧淖沒手足如此百餘步始可立寓目或垂若鐘
簏或植若旌纛有如案而平有類几而曲鐫刻非人工

晶瑩粲黃玉遙知竅穴外定有金庭錄凡肌不可往叩
擊安敢黷鸞鳳無消息但見白蝙蝠却還望微明既出
猶喘促沾衣憐石髓孰悔泥塗辱庶幾達微慕養生相
吾福

毛公壇

古壇疊亂石草木何參差黃衣宇其傍陳蹟刊豐碑曰
初劉真人齒髮不可訾但見紺綠毛被體鬚鬚垂雲軒
一日去空山留庭壇弟子散巖谷荆榛蔽荒基晚有周

息元探訪親斬披白鹿忽跪前靈符見歲蕤地勝人既
偶凝嚴起寶祠束帛下幽聘良馬維素絲前朝揖高風
有美皮陸詩迨今三百年事去物亦隳喬松委樵蘇野
蔓號狐狸惟有鍊丹井甘冽無等夷一酌匪消渴欽慕
尚神禧

松梢詩

朽屋延暗暝鑿明快吾魄西墉偶面勢開牖遂生白茲馬
玩圖史亦以置牀簀豈能來清風猶苦對殘赫炎天適暝

早永暮坐燭炎賓客何可處兒女哀不獲咨諏或獻計蓋
覆乃其策架木湊簷瓦鋪竹施葦席聊且紓暴酷未足為
佳適北山多喬松倚天不知尺綢繆星日暗轆轤鬼神宅
棟梁尚匪材枝葉固何益敢告持利斧斬伐遵指畫束
縛如見遺無使曲傳直此身得餘庇陰德佩無數

楓橋詩

二十送上鄉老書白髮堂上懽愉愉岐亭酒罷不忍別
二百餘里來姑蘇楓橋古岸冬十月霜風切骨草木枯

拜起欲去更付囑攜手泣然雙淚珠明年偶中崇政第
赤城山下欣迎扶穹蒼不與奪榮養星霜未周罹明誅
顏色不見已三歲肝血泣盡留形軀隱淪無業養慈老
骯髒又作卑官圖還道楓橋舊別地依依風物春陽敷
人烟山色一如昨齒髮獨改親則無萬杵入心交落涕
水邊且欲留行臚平生一天已無戴縱得寸祿何為娛
時乎窮達又未決行矣願報生前劬

貧女曲

貧女四十無人問不傳鉛華水梳鬢非關顏色不如人
不肯出門羞失身零落床頭舊機杼池水漚麻還織布
布成不賣市中兒金刀翦雪自裁衣

太湖一首和姚子張

太湖可漁山可樵漁樵隱者非一朝醉拍溟渤摩穹霄
歌詠周孔追松喬故磯人歸今寂寥秋空浪穩蘭為橈
何為不去走市朝况無一策陳虞堯嗟哉生事垂簞瓢
母齒豁豁羣兒齠啼寒悲飢如鴟鴞古人以此嘗折腰

敢不歡喜祿下僚滄浪有景真不遑西風起時心搖搖
異日掉臂君可招

三峽橋

銀河源源天上流新秋織女望牽牛洪波欲渡渡不得
以鵲為橋誠拙謀胡不見廬山三峽水此源亦接明河
底擘崖裂嶂何其雄崩雷泄雲勢披靡飛鳥難過虎豹
愁四時白雪吹不收燭龍此地無行迹六月遊子披貂
裘誰將巨斧鑿大石突兀長橋跨蒼壁行車走馬安如

山下視龍門任淙激寄言牛女勿相疑地下神工猶更
奇喚取河邊作橋棟一年不必一佳期

騎牛歌

舜俞謫官廬山之下常陪大博劉公乘黃犢

往來山中因作歌以記之

案此下三詩永樂大典編入三劉文

集原註云舜俞熙寧五年為山陰令以不行
青苗自劾謫監南康酒稅又載南康舊志云

舜俞與擬之乘黃犢嘗以六十日盡南北

山水之勝有廬山記五卷李伯時畫為圖

我騎牛君莫笑人間萬事從吾好千金市骨駿馬來乘

肥大躍湏年少蒲為韜草為轡瀑布山前松徑裏看山
聽水要行遲駐策緩驅塵不起布袍葛帶烏接羅山家
裝束不時宜匏樽注酒就背飲縹囊貯書當角垂吟或
狂醉欲倒同醉同吟白雲老此老不可天下人一住廬
山三十春聲如鐘目如電七十神光射人面上牛下牛
不要扶合與山中作畫圖汴州馬上竟如何春泥沒腹
雨濺帽夜半歸來人已痛天真喪盡百憂集衣食毛髮
歸妻孥爭如來騎牛水光山色同悠悠

和部使者騎牛歌

君平山前白雲老五十休官何大早咄哉官卑莫行道
鸞鳳豈肯爭梁稻愛山愛水去無時漸老更買黃牛騎
長髯老奴挈榼隨白紵皎皎山人衣因憐湖邊有逐客
也解忘形樂泉石不使執轡從翁遊翁自出錢為買牛
山中酒美數酹我醉裏詩成要我和市兒指點應不識
底不輕裘走快馬毛夫子真國士出問風謠宣直指瀟
灑本是神仙人功名強為蒼生起聞說騎牛不詆訶手

擘紅箋為作歌英辭百卉鋪錦繡雄辯三峽傾銀河我
牛入山路漸熟好歌吟聲易成曲明年恩亦當放還直
入深雲無管束欠却劉家買牛黃金錢又得毛公騎牛
碧玉篇

和劉道原騎牛歌

陳子無能久棄廢騎牛入山學遁世劉子有道憂天下
欲取相印乘駟馬二子相逢湖水頭進退兩忘俱未酬
長歌對市人聞者應擲揄君不見蔡澤不相終躍馬甯

戚未遇先飯牛腰懸六黃印廩食萬戶侯人生顧何常
古來海水生柔桑少華一峯已為谷白日西出明朝陽
男兒蓋棺事乃了目睫榮悴空悲涼水之曲山之傍歲
窮且飲酒富貴無相忘

附錄劉渙騎牛歌後序吳順義中史虛白先生北海
避地於星子常乘牛往來山水間今民間尚存史先
生騎牛圖余退居廬山出入遊覽往往徒步者蓋患
其以人為輿雖慕先生所為而猶未暇嘉禾陳令舉

嘉祐間中賢良科逡巡十餘年方涖邑事復以詆青
苗利病忤執政名重天下謫東市征欣然就局余山
林獨往得以親傾何樂如之時同泉石之趣因羨雙
犢以遂其志而又得詠歌之美敢礮石以永其傳歲
癸丑熙寧六年正月五日江西劉渙叙於篇末

送南康劉道純秀才起應新詔

太平天子厭弊舊盡解綱條重結紐一朝進士各名經
五百年來病聲偶弟子增員崑穴空博士獻書車馬走

鴻薄青冥昔在籠魚憶滄浪今脫筍乘時得志君其人
平生好學氣撞斗詆訶毛鄭為低眉辯說儀秦不容口
本需束帛賁圭衡勉應新書辭畎畝時髦往往出江南
解褐須期居帝右藏珍韜櫝元待價搦矢撫弦須應手
勿學迂踈魯兩生是古非今空白首

贈通慧大師淨務

鄱陽江頭逢道人昔我先子遊從親口誦先子詩別來
三十春我悲不忍聽泣然淚沾巾道人見我少小日嗟

我老大空埃塵我謂道人言姑願有所陳公孫希世董
生逐子貢結駟原憲貧伯夷采薇避周粟許由洗耳為
堯民道雖有用舍天實為屈伸子誠空門士胡為甘隱
淪邇爾拔士到屠販圈牢往往生麒麟延英賜對不膜
拜下視羅什來姚秦方袍騎馬使絕域賀蘭山前無緡
紳如子固不羈何不自化青雲身今我迂踈不知返悠
悠如海空迷津無錢買山廬峯下行欲東來長水濱子
如厭世欲已矣來寄瓶錫為吾鄰

贈湖州使君李公擇

李侯車騎匆匆出前騶不鳴隨者急不遊臺沼不尋山
獨向城隅小蓬華城隅蓬華謂誰家太學先生賢已卒
老妻猶在八十餘侯來為問夫人疾當時弟子猶五六
連袂追隨脊倉卒手調湯藥進盂盤勞問有無極纖
悉巷人來觀相嘆喜門外牆頭聞唧唧我思康定慶歷
間天下文章極蕭瑟讀書不復問義理破碎么麼入聲
律先生始出治庠序輔養學者尊經術自茲道義及生

民晚見纁黃起遺逸先生今來骨為土名儒大義非前
日朝登龍坂暮高官舊學前功付幽黜往往昔遊茗雪
人詆諱不敢對以實李侯自是江南士不預吾徒舊堂
室尊德樂道乃精誠念老嗟貧固其秩魏文伏軾過西
河鄭公名鄉論高密古來如君顧無幾於今走利尤非
匹人言侯政如此多試聽風謠百之一

雙溪行

有序

熙寧七年九月予遊吳興遇致政張郎中子

野日有文酒之樂時學士李公擇為使君幕
客陳殿丞正臣皆予故人一日正臣語予云
昨日張子野過我吾家有侍婢何氏故范恪
太尉之家妓也窺子野於牖識子野嘗陪范
宴會因感舊泣數行下予聞之惻然交語公
擇公擇益為之悽愴即乃載酒選客陪子野
訪之酒行正臣不肯出何氏侑諸客飲獨使
在屏障中歌及作笛與胡琴數弄而罷其聲

詞無不清妙唯子野以舊恩得附屏障間問
范之廢興及所由來子野曰此范當年最所
愛者於是諸客人人憐之又嘉其藝之精而
恨其不得見也予因作雙溪行雙溪吳興之
水苕霅云也

星郎休官兩鬢白慣作五侯堂上客

原本缺第三句

半入人家

鎖深宅偶來花幕雙溪頭聞有侍兒舊相識五馬情多
載酒過主人猶須屏障隔黃昏移燭背重簾初度清歌

響疎拍宛轉別是京洛聲中有離愁千萬尺曲中復作
孤吹笛玉龍一吟羣籟寂金壘不酌四座聽淡月朦朧
挂空碧更將餘意寫琵琶手抹鳳槽鳴歷歷梁州欲徹
么絃斷應恐外人知怨抑主人不許傳青翼獨聽星郎
語近壁小聲嗚咽話當年公子樽前最憐惜朱門出後
身轉輕往事消沉無處覓星郎自有流落恨回向玳筵
雙淚滴勸君收淚聽我歌聚散有命可奈何君不見隴
頭水入海不知幾千里又不見風中花吹向千家復萬

家人生莫作等閒別事去老大空咨嗟

示諸弟

吾家崛起蓬蒿間先君為學良苦艱典衣買書教我讀
平生貧窶不此慳歲晚纔霑寸祿養天禍無何頽泰山
況時汝輩各小小不及見汝學燕閒逮今孤露歷歲月
漸覺長大成疎頑詩書堆積有素業文章體要亦易攀
固須仁義力造詣慎擇朋友少往還偏親堂上待甘旨
況已齒齷雙鬢斑更可踟躕忽榮養不如烏鳥鳴關關

官家公道祿寒畯勉旃進取歡慈顏

淮陰阻風讒風伯

滔滔淮水溢楚之疆原田其潴城郭為防浸以廣兮不
可涉浩乎險兮不可航粵有行者欲泝其央編莞為帆
植木為檣幸飄風以憑乘遂吾歸而徜徉爾風謂何不
自西北阻我攸往維伯是職悠悠水濱奚獨予留有百
其役若干其艘粟麥兮中都之餉饋布帛兮赤縣之衣
裘府臣引領以俛指挽夫坐糧而寢餽伯復不知天子

聖神以民為憂聞此方國常墊橫流分筆舌於嚴署洛
瘡痛於諸侯有淑使者仁豐義脩體上所囑同辭合謀
今此欲往會于道周倡和出話下民以休風之不遂非
伯誰尤上帝可訴讒言孔庶將伯是怒不如風兮命之
去

明日北風尤甚不可行再讒

我行楚濱洪波是涵飄風不惠停舳相銜我實有辭將
伯是讒越明日作若怒弗咸大吹振蕩厥聲唬喊龍憑

虎借播谷搖巖止莫能維行不可帆誰令其然維伯所
監我名有譏實意以禱終使不往寧弗之報泛泛行者
有游有漕罔不衣食或俱幼老出其孔艱仁者攸好吹
而順之母忽予告

謝風伯

晨風飄兮弗疾弗暴我舟汎兮以安且蹈云誰之賜神
伯予報莫阻乎淮如彼行舁莫遠乎泗曾不日到我譏
不淑我辭靡好伯其憐汝其還壽考伯實神聖善人是

悼鼓動萬物永輔有昊我歌我詩以薦行潦

題婁億墓

彼何人之門兮鴈行馬車老夫懷金兮童子紆朱其取
萬鍾兮不差毫銖庖有梁肉兮腹無圖書天之生此兮
何罪何辜句讀其話言兮節文其步趨抱筆而宵吟兮
鋪楮而晝塗天子招其以仕兮鄉人勉呼衆肩相煦摩
兮疾駕爭馳驅有司五上吾名兮禮部曾不一如退將
羸其角兮進且跋其胡行年幾六十兮僅免為白徒一

秩不能勝兮朝強而暮殂考妣其謂我何兮遑悼妻與
孥高者我難諏兮厚者行難語諸百恨寂默兮秋草之
墟

欽定四庫全書

都官集卷十三

宋 陳舜俞 撰

詩

宿靈源院

山家皆種橘古寺獨栽松
林靜時棲鶴泉靈合有龍
何年人捨宅今日我攜筇
寓所留僧話未眠聞打鐘

閱目堂僧橘

閱目堂前橘山僧手自移
為迎林下客旋拄路邊枝
結

實曾防蟻盈箱不禁兒他年應計得蠟枝過門時

落葉

風露入林阿紛紛奈落何滿庭添景野開戶覺明多未
逐滄浪遠堪憐腐草和無由遮醉眼歸思滿烟波

中夜

強寢夜何永通宵夢不成曉燈寒有暈跳蚤靜聞聲宦
拙宜身退家貧長道情自憐前計失半世慕虛名

客意五首

客意久不適攬衣臨暮春烟長藏野闊雲斷漏天空酒
置千愁裏詩成一望中黃花無限好底事憶江東

二

行役意匆匆淹留計已窮夢歸無奈曉病覺不禁風憶
橘園垂枳沉魚夜聽鴻悲秋成白髮賴未作衰翁

三

高岸聳如陵秋光著處清遙山照眼碧黃葉逐人行莫
怪新烟火曾經古戰爭深林茅屋小氣象亦豪英

四

水濁不見面安能照膽明還因送流梗所得計歸程日
落西風急秋深積潦并清江前約在賴未濯吾纓

五

况復淹旅泊情多秋亦悲寒雲欲垂野疎葉不藏梨斷
梗逐流水歸禽投好枝徘徊古原上應有夕陽知

阻風還泊舊浦

已作淹留計行艫豈恨遲却投前浦宿還似始來時寥

次鱸鄉遠飄零鶴髮悲猶欣有隱者度景覆殘基

時有姜隱

和附
子舟

題秋浦亭

牢落真秋浦江山滯客舟身同鴈南去心似水東流
鳥荒煙裏漁人古渡頭只因山色好來上九華樓

彭澤縣

古來彭澤縣應有折腰人百里昔猶重先生豈不貧
菊花還在否柳色為誰新白髮南遷客淒涼問水濱



題東林寺

淨社清談盡高名野史傳空山留舊寺老檜識當年殿
古應藏壁僧閑學種蓮徘徊二林月猶照虎溪泉

以橘贈湖州李公擇

去著登山屐夢歸清雪門親嘗霜後橘思侑府中樽為
問林間路曾過水畔村人言封境近往往被公恩

送可則上人還京師開講

善作空王子能探佛隴心浮雲無定住流水度光陰羈

食開孟慣飛塵壞衲禁國城傳法後倚錫舊山林

過下方祇園入上方看經院遇八十老僧

因過下方院更指上方登偃蓋杉松路包金橘柚層清
灣從古好孤榜復誰曾八十年前事淒涼欲問僧

次韻吳少卿致政自詠

掛冠歸故里尋壑具巾車蘭蕙庭階茂交遊世路疎一

壺新漏箭

吳公自作漏箭

千姓舊囊書

吳公作千姓編以自遣

寄問從公

客家金有幾餘

奉酬長文舍人出城見示之句

春分臘雪未全消凜冽春寒氣尚驕攝事初忻迎社燕
尋芳因得過溪橋清浮酒蟻醅初撥暖入鶯篁舌漸調
興味愛君年尚少莫嫌齋禁一作齋館暫無膠

贈徐道士游京師

有客人形善鑑觀過門聊肯駐征鞍知予謾失江湖約
笑我甘為簿領官卜隱日邊龍闕近去程霜裏鶴衣寒
京師車馬飛騰速別把金波洗眼看

將至嘉禾先寄諸兄弟

半年西走若飛蓬得祿無多計屢窮驥足寒孤甘伏阜
鴈羣驚迸苦傷弓家貧不易新堂構天幸猶能遇歲豐
且待歸來都講論一篙烟水越霜風

送劉吏部得請三茅崇禧觀

老臣連上阜囊封去訪三茅駕鶴翁曾為蒼生論敝事
因從紫府得仙風收身物外光陰好回首人間寵辱空
果滿丹成家法在應攜雞犬入雲中

和王介甫寄安豐知縣修芍陂

雩婁陂水舊風烟可喜斯民得繼傳萬頃稻粱追漢日

五門疏鑿似齊年

齊高帝時桓
榮祖嘗修

才高欲獻營田策公暇

還來泛酒船稱與淮南誇好事耕歌漁唱已相連

和知郡王職方韻同前

邑陂增築更淵汎所喜詩筒賞嘆深楚國老臣千古意

廬江賢守一家心

漢章建初中王景為廬江太守嘗
修是陂今太守與介甫皆其宗姓

邊野史添新事壠上春犁誦好音興利勸農真政術可

知為吏得喉襟

南陽春日十首

城頭古木未知春
官柳柔條日日新
門巷旋開沽酒市
郊原便有踏青人
風烟乍煖禽初好
網罟猶多雉肯馴
擬為芳時對樽筍
愧無心事樂天均

倦懷春晚脫征驂
官况喧卑昔未諳
敲扑豈甘忘素業
琴樽猶可助清談
窓燈耿耿書開卷
衙鼓鼕鼕吏放參
唯有登樓心不愜
亂雲堆霧鎖東南

山川隨處有芳菲
老大情懷與舊非
已恨鶯聲驚曉夢
豈堪花氣著人衣
家疏未省添新斲
宰木應曾長舊圍
終向畏塗無所得
好風佳月不如歸

花前惆悵轉難平
屈指光陰已半生
猶把此身嘗患難
不知何日得功名
未安去住千絲亂
已去悲歡一夢驚
擬入醉鄉銷此恨
快風無故折春醒

壯懷摧折復何言
齒髮今年老去年
念遠片心飛鳥外
感時雙淚落花前
琴逢過客生難理
詩擬離騷怨不傳

家在五湖明月裏夢隨春水宿漁船

客宦逢春病眼開紫荊花下也徘徊謾勞人力書千卷
聊寄天真酒一杯明代本期無棄物孤臣何敢自論才
且欣腐鼠同烏喙不怕丹山有鳳猜

簿書堆裏得天真謾為浮名役此身門柳偶同陶靖節
君羹空羨潁封人沙鷗舊許為吾侶巢鷺何曾厭我貧
已共東風有歸約且從桃李笑今春

故園春物有誰同地盡天垂杳靄中杏花柳煙燒白晝

茶槍筍槩戰東風橋橫酒市青帘出門對漁磯小艇通
誰信南陽樓上客翩翩歸羽欲飛空

澤國生涯有釣舟此身隨分狎羣鷗非關利祿成羈紲
為學文章作贅疣病眼看花空濺淚客顏臨鏡復包羞
江東父老應相憶燕子來時語不休

半生名宦是塗顏菽水當年尚可歡鍾鼎未能光祖妣
牛羊雖美愧盃盤五千強誦誰云補四十無聞得自安
不覺尋春上臺榭東風吹淚落關干

和開祖丹陽別子瞻後寄

仙舟繫柳野橋東，會合情多勞謫翁。
相對一尊浮蟻酒，輕寒二月小桃風。
羈懷散誕謳歌裏，世事縱橫醉笑中。
莫恨明朝又離索，人生何處不惄惄。

和章子厚聞子瞻買田陽羨却寄

罨畫春流藻荇長，吳門菰米鰕鱸鄉。
謀田問舍拙者事，尋壑買山君底忙。
出處兩忘同旅寓，濁清一種付滄浪。
故人詩酒如驅使，白公詩云詩酒尚堪驅使在別有甘泉綠野堂。

次韻酬余彥翔

我慙希世就窮儒甚矣謀身子更迂不共梟狐倚城社
合隨魚鳥樂江湖古來只有風猷重事去情知氣味殊
髀肉縱消吾舌在任從兒女暗揶揄

次韻酬白天覺

人生自致真非策歲晚無成可復論鈍駕謾思追驥躍
病巢何敢慕鴻鵠傲如中散仍多疾辯付南華盡不言
聊謝高情白夫子為攄騷興慰王孫

謝楊都官見惠金雞

珍禽流品可褒題
天與文章五色齊
羽翮已堪攀鳳翼
稻粱爭合在雞栖
應思舊侶雌雄舞
恥學凡羣旦暮啼
好向彩衣堂下養
名郎從此樂持齋

送李戶曹官滿還江寧

去程牢落且徘徊
聽我高吟侑一盃
皦日心胷無愧恥
青衫顏色任塵埃
秦淮形勝多人物
晉室風流入草萊
歸到江山聊洗眼
下僚應不久沉才

鳳凰臺

鳳去臺存碧草濃遊人來此問遺蹤故巢風月已千載
好景闌干空數重府坐循良黃太守乘輿仁聖漢高宗
竹花生子梧桐老底事丹山信未逢

十八賢臺

臺下衣冠已化塵臺前顏色尚如新林泉合是脩行社
巖穴誰非避世人好鳥豈知當日事幽花何似昔時春
老僧不解論今古應笑徘徊問隱淪

淵明醉石

聒聒飛泉清遶石悠悠天幕翠鋪空是非分付千鍾裏
日月消磨一醉中柳絮任飄荒徑畔菊花仍在舊籬東
水聲山色年年好堪使遊人恥素風

東庵

已憐門巷林中出况復軒窗水畔開冷淡山光明枕簟
動搖波影上樽罍坐看天際孤舟失慣見桑陰五馬來
長恨夕陽吟不足欄干留共月徘徊

太平觀

繞繞峯巒玉案圍重重樓殿紫烟飛青藤素簡天門近
絳節霓旌夜半歸鶴使每傳三島信鳳書頻送九霞衣
放臣於世慙無補金萼樓前拜不祈

東林寺

白髮老僧安住處青山司馬愛閑來松蘿天近株株短
花待春歸款款開堪信壺中藏日月誰知雲外有樓臺
官卑合是尋山客不見芳菲意懶回

西林寺

東林移宿過西林風靄蕭蕭結暝陰隨處水聲喧屐齒
傍人山色上衣襟道於塵土知無用樂在雲泉亦損心
擬付離騷與猿鳥樵蘇應怪久登臨

棲賢寺

辟地行者應開寺拭眼高僧尚有墳龍帶雨歸三峽水
鳥啣花出五峯雲樓臺屹屹天宮近鐘磬疎疎俗界聞
遊客不嫌車騎遠巖扃無計長苔紋

萬杉院

仁宗御書寺額

銀鉤金榜佛家園
履齒初來骨髮寒
天上星辰留翰墨
人間陵寢閼衣冠
虬龍擁護神如在
雲霧遮藏色未乾
四十二年蒙雨露
草茅猶解泣沅瀾

開先寺

山門屹屹橫青嶂
巖屋霏霏帶紫烟
千尺老松當大道
一條飛瀑落中天
重來覽物應相識
此地尋僧似有緣
自謂讀書非俗吏
謫官猶得近林泉

新羅巖

萬疊青山與世違一巖雲物倚天危僧開峭石難行路
猿叫枯松最上枝藥鼎施人寒種火菜畦行虎宿無籬
此中別有忘年事擾擾紅塵死不知

竹雲洞

長干龍老長龍孫竹裏陰陰鎖畫雲莫問何年初入洞
由來一日可無君清園欄檻喧難入翠滴衣裾靜欲聞
會待歲寒看苦節憑誰吟對雪纈紛

峯頂院

自憐隨分有仙蹤曾宿金庭第九重誰謂謫官真俗吏
還登廬阜最高峰坐頭平揖千巖月枕底微聞二寺鐘
歸去林泉緣更熟定應春夢却過從

雪

老來惟有看山癖踏雪來尋洞府春以愛匡廬無俗吏
更逢姑射露天真參差玉樹千巖裡高下藍田一水濱
乘興去留人莫怪風流元是剡中人

靈溪觀

靈溪流水碧潺湲溪上清輝弟子園
白叟荷鋤春採藥黃冠敲磬夜朝元
山中松葉堪為酒路口桃花似有源
自是遊人無道骨長生何必五千言

落星寺

何年翠麓浮彭蠡云是寒星落斗牛
遠水拍天圍淨界野僧依石起朱樓
攔干白日風吹鴈簾幕黃昏月近鷗
安住自成難老藥不須乘海覓蓬丘

承天院

建昌門外小禪居竹檻松牕靜有餘
全近江湖添悵望乍離城市易清虛
人思求友聽啼鳥僧愛忘筌看得魚
不為山南多勝處便堪從此駐巾車

寄星子令柯季立

慣見江湖賤逐臣去尋幽穴或相親
不知金馬曾為客猶得銅章肯借人
夜夜水聲隨枕簟時時林色上衣巾
題詩半在山南寺請戒岳僧掃隙塵

寄郊景仁郎中

早歲交情淡已親相逢羈旅白頭新雖慙管鮑論高誼
欲慕陳雷卜近隣客舍每羅門外雀歸來還滿甌中塵
明年相逐東隣去未必鱸魚駐得人

中秋佳月獨游垂虹亭有懷胡完夫蘇子瞻錢
安道

五湖人住覺天寬有月清秋似廣寒玉鑑光中數毛髮
長虹背上倚欄干棲鴟誤曉啼還住白露沾衣濕又乾

借問姑蘇胡別駕簿書燈火共誰看

胡完夫

月光清極向中秋千古松陵此夜遊寥泚更無雲礙眼
滄浪合是我維舟浮生未有明年約淺酌聊資到曉留

辜負金波三萬頃詩豪草聖在杭州

蘇子瞻

玉兔光中繫小桅長虹影裏倒罇罍一年此夜清秋半
萬里無雲霽色開月女嬋娟如有舊波神安穩亦憐才

合須豪飲酬佳賞不共烏臺御史來

錢安道

留槎閣

聞說歐川似沃洲一溪分作兩溪流長橋跨岸虹垂地
高閣凌空蜃吐樓浩蕩乾坤供醉眼淒涼風雨送行舟
憑誰為問乘槎客未必無人犯斗牛

禹穴

百尺蒼堅穴翠嵐天痕非擘亦非鑿先王圖史誰分掌
後世疎慵不復探定有龍虬蟠寂寂如何苔蘚亂髣髴
老師更說神靈事只讀高碑去未甘

谷簾泉

玉簾鋪水半天垂行客尋山到此稀
陸羽品題真黼黻黃州吟咏盡珠璣
重來一酌非無分未挈吾鋌可忍歸
終欲窮源登絕頂帶雲和月弄清暉

若耶溪

十里澄溪溪上山溪光無際照山顏
天嫌俗眼尋常見地惜羣峯左右闌
蓬島也應非海外瓊臺爭合貯人間
維舟正欲踟躕飲坐見蒼烟罩翠灣

天池院

張景詩云若以山形比人骨此池應合似泥洹

此峯巖絕與霄干峯頂泓澄旱不乾
天下定應添沆瀣
山頭信亦有泥洹等閑雲出千巖雨
取次龍歸六月寒
一勺自堪留萬古何須低處羨波瀾

題翠峯院

借問鴟夷與季鷹五湖珍賞復誰曾
慣看銷夏灣頭月
唯有莫釐山上僧
晚渡浪痕沾壞衲上方雲液灑枯籐
游人欲趁沙鷗去更伴禪公上翠層

青龍江醉眠亭

酒擔長輕六印腰
醉中一枕敵千朝
興亡貌比榮枯柳
聚散看同旦暮潮
清興本應塵外得
香魂徒向水邊招
已聞佳士過從約
不為東風返畫橈

水月院

興隨白鳥汀洲立
步入青林臺殿出
湖脈來通方士泉
山顏分入幽人室
自苦扁舟每訪尋
何世空谷無遺逸
一夜霜風穿客衣
二十六房皆採橘

題碧蘚亭

瀟灑闌干碧玉叢頻來遊賞似兒童縈迴脩竹撩清影
刻畫新詩繞翠筒十載雪霜林色改幾番風月酒尊空
子猷老去心長在終擬為隣作醉翁

送喜長老遊四明

釣竿無竹不空船事去朱涇不記年一句弗由他物得
此心知與麼人傳無鬚王老長垂地掉臂胡僧仰託天
去問玲瓏岩上石个中誰是我師禪

寄姑蘇智肱錢塘文捷二上人

釋子紛紛奈汝何傳聞右繞益乖訛南山述作那堪毀
西竺師徒果有魔羣蟻固應隨轉石一杯焉可障顏波
青銅瓦礫皆稱鑑乞與光明歲月磨

傳神悅躬上人

倦轡曾投林下宿短篷重見越江邊人歸河岳儀型在
事隔桑溟物色傳弟子共談庭際柏公卿多識社中蓮
高風自出空王侶馳譽丹青是可憐

山中寄姑蘇守倅

莫釐山頭萬家橘震澤閑人一葉舟
林裊金丸出籬落浪噴雪陣上汀洲
雲生縹緲吟魂遠日入穹窿醉望收
不禁五湖客小隱為傳篇什謝蘇州

過平望驛有懷湖州李使君二首

柳色陰陰平望橋春流西受雪溪潮
玉樓有月清光遠蘋渚生風麗思飄
寧使簿書堆几案已聞歌詠滿漁樵
酒船欲訪烏程去愁費金龜返畫橈

憑熊飛隼兩溪頭人似冰壺住玉樓
事逐歡謠入漁釣

詩隨秋思滿汀洲
茶收顧渚旗猶卷
酒貫烏家蟻半浮
去路無多平望驛
客魂秋雨宿扁舟

晚秋田間

重到田園草木陵
鬢毛蕭颯白綸巾
謾誇孺子能分肉
堪笑書生尚負薪
靜與禽魚何物我
嬾因雞黍記晡晨
東籬已有黃金藥
只欠麻衣送酒人

挽邵夫人詞

丹陽門第三朝貴
樂壽絲綸五色開
有助清郎終盛譽

得隣諸子盡高才
蘭彫北畹香猶在水
向東溟逝不回
原上送車西數目
日西風雨轉徘徊

挽劉夫人詞二首

籍籍家聲起草萊
詵詵子舍奉蘭陔
翩翩三鳳皆英物
蹭蹬雙駒亦駿才
憶昔綵衣環几烏
于今清血洒圜盃
何年盛事聯簪組
別有絲綸薦夜臺

卜隣早效三遷教
負米方休百里勞
樂事難留同逝水
孝思無盡入伊蒿
萬家原上開新冢
舊館人來奠濁醪

况有銘詩傳不朽長城千古白雲高

挽侍講先生王夫人詩二首

蘭陔堂上此歸全松栢山頭有舊阡
我得遐齡幾九十人依絳帳昔三千
病時太守和湯藥沒後諸生侍几筵
善化羣材同草木先生恩德重如天

師牆童稚被陶鈞穴鳳仍同桂籍春
豈獨慈良尊有道就論恩分即吾親
生前未許升堂拜原上空陪執紼人
一曲薤歌難寫恨哀榮千古付蒼珉

欽定四庫全書

都官集卷十四

宋 陳舜俞 撰

詩

山中詠橘長詠

包橘古云美揚州地所宜名從夏后貢頌見楚人辭雲

夢分膏沃

呂氏春秋云果之美者有雲夢之柚

璇星散陸離

春秋運斗樞云璇星散為橘

洞庭仙壤接

水經云震澤包山林屋洞天與洞庭湖相通故震澤山中亦有洞庭之名

震澤

水烟披袖酢徒然早柑黃豈厭遲封君千戶等老圃萬

奴隨秀萼瑤瓊綴青陰幄幙垂朱衣霜傳來素裏露含

滋弱幹金九重繁條火齊纍灰生先作辦蠶老不成絲

爽味鍾寒律殷安照夕曦清香掩蘭杜真液賤楂梨揀

選收藏日

采橘日以冬至前二十日為候凡得霜後及有西北風後天色晴霽時則家家采而藏之

無過冬至前十日者過則為寒所損亦損明年樹矣辛勤種接時壤須來處美

皆樹

用小舟買於蘇湖秀三州得於湖州者為上亦莫能語其由也移怕樹同知

齊民要術云移樹無

時莫令

朱綠爭珍旨

有朱橘有綠橘

荆湘辨等差

橘有荆南種有湘州皮者

蹊深比桃靜

一無纖草夾潔成蹊

歲晚與松期

歲寒不凋

壇甃龜龜石

種樹傳山為級以石砌園栽枳棘籬討蟲煩鑽鑿樹有之龜龜二山在太湖中

實不蕃春夏用小鑽鑿取而殺之謂之討蟲科冗付蒸炊採橘後即芟去小枝不能結實者謂

之科穿井防天旱皆鑿井於樹旁貴負荷之近也熙寧

七年大旱井泉竭山中擔湖水澆樹有一家費十萬錢雇人者穰瘟甚歲飢橘忽有堅

者謂之青瘟黑瘟往往祝祭禳祈焉向陽刪密葉橘得日則色亦深而味甘伐木樹低

枝橘繁則樹有義曾分客山中橘熟時見客來者無不為贈無偷不禁

兒小兒習見厭食不復為偷牝切嫌連雨長雨多則皮虛而大不可久藏謂之牝也

老要勁風吹見上滿把留長蒂採橘必留枝蒂成一掘三指所以養橘否則易

乾盈箱藉短茨

破竹為籠藉用短茨

入倉寧愧稻出汗僅同醫採

先制地板上堆之數日謂之入倉微覆用草使汗出然後入籠謂之出汗否則味醃雅俗傳珍

惜深林或棄遺稍收先落子

摘生花至繁初結實多落收之堪淹藏為藥摘爭

曬已殘皮

山中人言東西兩山賣乾橘皮歲不下五六十秤

趁市商船急充庭

使驛馳公筵薦魁磊內合送瑰奇

貢柑有徑圍之限大者不敢以進慮不可

常也唯官府公筵負擔至京師賣之貴家最為大矣

寄遠曾非選

寄惠遠惟未甚熟而小者乃不

壞既黃而大者不能久矣熏藏品最卑

橘之小者謂之脚橘山中作土窖熏用烟而收之謂之熏

摘善生惟計畝

種橘大姓不復計樹若干但云有幾畝

視價旋論貲

每一百斤

為一籠或得價籠一千五百
錢下價或六七百不可常也
薄探酬春賞精嘗侑舉卮
他年修果譜應載野人詩

銷暑樓

溪上樓臺似玉壺
樂郊春物剌昭蘇
賢侯好士簪裾集
暇日開筵錦繡敷
擘水鱠鱸堆白雪
撥醅釀酒滴真珠
香飄沉穗縈欄角
歌沸梁塵落座隅
約畧十洲仙界景
依稀九老洛川圖
席中蘭語薰相襲
望裏蓮娃貌亦都
狂客笑吟聊自若
丈人強健不須扶
送歸千騎堂前月

猶照簾蝦一半鬚

弄水亭

未識貴池好嘗聞弄水名
白鳥鑑中立畫船天上行

壽陽僧房見橘詩

地過長淮種橘難
僧房今見鎖朱闌
秋來賴有黃金實
幾被行人作枳看

次韻六安魏明府三首

故人芳信落江東
開解愁顏與病悰
自笑漫生湖海上

畧無豪氣似元龍

少年心志欲摩空
漸老卑飛悔滿悰
早悟割雞堪飽腹
不須辛苦學屠龍

幾慕功名逐轉蓬
既無成就苦為悰
不如歸聽華亭鶴
耆舊於今憶二龍

寶慶院

小招提在白雲層
古殿深龕鎖畫燈
山北遠公曾結社
至今猶有種蓮僧

題爐峰閣

為愛爐烟拂畫簷
小欄終日捲朱簾
不須更踏山前路
可是人間看得厭

再經太平觀訪沈道士不遇二首

行客尋山去又回
羽人依舊未歸來
洞門不鎖清風入
黃葉無言下翠苔

不見芝巖駕鶴翁
抱琴歸去悄無蹤
黃花似有東籬舊
山後山前取次逢

興福院僧房

東西遊遍兩山村
梔子黃時橘滿園
惟有小軒臨小澗
病僧欹枕聽潺湲

宿上真宮贈朱道士

天同中葉
道昌捨宅

棲真必是朱癡後

朱癡子見續仙傳

結字元因法善孫
人在地

靈治病速山村
討藥夜敲門

書通濟僧壁

丹色赤實破蒼顏
冬至都無十日閒

山客採橘以
冬至為候

剝選

黃柑留過客天寒誰肯更尋山

上方僧京師識面短句二首

亂雲峯頂紫田翁二十年前輦寺逢
怪我無成頭白早
千金散盡學屠龍

老僧曾住日邊寺慣識金鞍馬上人
雲外不知人易老
從頭相問盡埃塵

贈華嚴院玉真上人

青蘿翠竹鎖禪關門對松陵第一灣
白髮老僧應有道

等閒隨客過前山

上方化成院

陳恭功德院巖仁
宗御書歲度一僧

琅函密鎖君王字石壁仍刊宰相詩無限幽光動巖谷
山深惟有白雲知

虎溪

紫霄道士貪雲鶴五柳先生泥酒杯不為清風與明月
道人何事過溪來

乾坤
運寶

原跋

曾祖都官以慶厯六年賈榜登進士第嘉祐四年與錢公藻同中材識兼茂明於體用科實為舉首熙寧中知越之山陰縣會新法行上書極論其害遂貶監南康軍酒稅累年竟不仕以沒祀無似馮藉先世遺烈叨躡從班惟知兢懼以保門戶先考刪定寶藏都官遺文杞頃為閩中常平使者嘗刻之版未成而移漕廣右委之寮屬尚多舛舛每以媿恨泊來此邦念都官本以明州觀

察推官試大科欲考陳迹則相去百四十餘年不可得
知集中自言十五年閒再官於天台四明之二州猶有
鄞縣鎮國院記等文存焉因再加讎校而缺其不可知
者屬郡博士郡從事刊之以廣其傳仰惟曾祖風節峻
厲凜然如生不肖孫曾恃有公論不敢贅辭云慶元六
年十月望日曾孫太中大夫徽猷閣待制知慶元軍府
事兼沿海制置使杞謹書